

# Epesus

## Pol pepa bolo dumo Epesus una awi

<sup>1</sup> Na Pol. God yene nomane pai mal pille na dje wori, na Krai Jisas aposelye molo kogoye yendo. Ye God unakiye Epesus molo, Krai Jisas boll pillgi djinj una ge, na pepa bolo ye aundo. <sup>2</sup> Nono Nane God ne, Iwa Kerman Jisas Krai ge soka ye wopake pille aumbellka, ye ellne tukne arngan yenda moye.

*Krais kogo yei al ge God wal porapora kupill al wopake paro ge i nono awi*

<sup>3</sup> Jisas Krai Ne ge God moro, yene kandjiye kerman panda moya! Nono Krai boll mormon pille, God yene kupill al wal porapora wopake paro ge, i nono awo wori. <sup>4</sup> Kamasa kupill makimb naye poke ge, God nono dje i. Une nono Krai boll mopon dje kane, nono wopake ta mal mopon dje pille, une nale al nono wambo napanda mopon dje pille dje i. <sup>5</sup> Kamasa God yene nomane pai mal pille une nono wopake pille awo, Jisas Krai kogo yei al ge nono dje i pakna wori, yene wombaye kaima mormon. <sup>6</sup> Ge pille, God yene wariye wopake kane dje wori woi iwa ge, nono wopake kaima pille awi. Une embe yei ge nono God kandjiye amblo pla worbon!

<sup>7</sup> God nono wopake kaima pille awi ge, yene wariye meyamiye al ge, nono top to i yem woro,

nono djingne djangne kere awi. <sup>8</sup> God wandill kerman golo awi al, nono nomane wopake paraka, wal merke pille kane yenmon. <sup>9</sup> Asa God Krais dje worda wo kogo yenda mal ge, God embe yenda dje pille moi ba kandja ge seke pai. Ipon une nono wopake pille ombine dje awi. <sup>10</sup> Wal nono ombine dje awi ge embe. Ege ta une djinda poke kupill makimb al wal porapora moro ge une i taimane woro Krais aundaka kantau yenda. <sup>11</sup> God wal porapora yendo ge, une yene nomane paro mal pille yendo. Une nomane pai mal pille dje wori Krais wo kogo yei al ge, no Juda una God dje inda, no une wombaye mopon dje pille, kamasu une embe yeno we dji mal ge kaima yei. <sup>12</sup> God embe yei ge, no Juda una asamoll Krais pillgi dje kui ye mopin una mormon ge, no God kandjiye kerman amblo pla kaima worbon dje pille yei.

<sup>13</sup> Alla, epil djell una ye mor ge, una wo ye God kandjiye wopake dje awi. Ga God kandjiye kaima dje awo embe dji, ye kondwe ke po djine dje Krais ye i yem wori we dji. Ye kandja kaima ge kani pille, ye Krais wombaye kaima moi. Ye embe kani pille, God asa embe yeno we dji mal ge, une Murble dje wori, wo ye boll moi. Une Murble ge yene makiye mal embe paro, ye une wombaye kaima moye dje pille dje wori ye boll woi. <sup>14</sup> God Murble nono boll moro pille, nono yene wombaye mormon ge, na wal wopake i ye auno we dji mal ge kaima aunda imbon. Alla, God wombaye mormon ge une nono top to indaka kiwa mopon we dji mal ge yene Murble nono boll moro pille, une nono kaima inda dje pupon. Une embe yenda ge, yene kandjiye kerman amblo pla worbon!

*Pol wopake we dje kamang ye awi*

<sup>15-16</sup> Ye Iwa Kerman Jisas boll pillgi djinj ge ne, ye God unakiye porapora moi al kanwopake ye awi mal ge, una dji pill. Ge pille na kamang yendo poke ge, ege ege na ye pille God moro al wopake we dje aundo. <sup>17</sup> Aundo ge nono Iwa Kerman Jisas Krai Ne moro ge, une poll dje au kerman djindo al moro iwa ge, une ye nomane amblo au dje aundaka, ye nomane wopake pandaka, God kaima moro mal ye kane kune yene dje pille na kamang yendo. <sup>18</sup> Ye God dje i una mor ge, ye nomane amblo au dje aundaka, God ye wal aunda ge, ye pille kane yene. Ye God unakiye mor pille, une wal wopake uro kaima aunda imbon dje kui yemor ge, ye pille kane yene dje na kamang yendo. <sup>19</sup> Alla yene yembe kerman paro ge una ne mal une boll kune yendo? Ge man, ba nono pillgi djipin una mormon al ge, une nono yembe dongall boll kogo yendo. Yendo mal ge, ye pille kane yene dje pille na kamang yendo. Une yembe kerman paro ge ta mal kaima paro. <sup>20</sup> Yene yembe dongall pai al ge, Krai golo, aglo er kupill al pi, yene agle woto ami dje moro. <sup>21</sup> Krai kupill al moro ge une pla kaima moro, er wekle pi iwa moro. Tau agelo kambono molo pla worbon dje yene mo murble kerman kambono molo pla worbon dje yene ba man panda, Krai plato kaima moro. Yene kandjiye kerman pandaka, una ipon mor ge ta molo pla worbon dje yene mo, are ege ta yenda poke una ta molo pla worbon dje yene ge man panda, Krai molo pla wordaka kandjiye kerman panda. <sup>22-23</sup> Alla God yewori, wal porapora moro ge Krai kake al kalto moyeke, Krai molo pla po

kantau ye pamoya. Pillgi djinj una Krai gakle mal embe mor ge une kantau yendo. Alla, kambono embe mor ge, une wo kambono boll ye kune ye, wal porapora moro ge une ye kune yendo iwa moro. Ye wal ge pille kane yene dje pille na kamang yendo.

## 2

*Asa goi mal embe mopin ba ipon Jisas boll gun mormon*

<sup>1</sup> Asa ye kandja napille singare ke ye wani pille, ye nomane ge goi. <sup>2</sup> Ye makimb una singare ke ye wani mal embe yei. Iwa kerman ta murble ke pla moro ge ye kantau yei, God kandjiye napir una mor ge, une para kantau yemoro. Iwa ge kandja dji mal ge ye embe yemoi. <sup>3</sup> Kambono yei mal ge nono porapora embe ye wanpin. Nono asa nomane ke paika gaklene wulle pille pla ye, wal bombon golo embe ye wanpin. God una porapora tonda mal ge, une nono aike tonda mal mopin.

<sup>4-5</sup> Nono kandja napille wanmopin ge, nono nomane ge goi mopin, ba alla, God nono wopake kane kapak to awo, Krai awo worika nono une boll aike gun mormon. God ye kondwe ke po djine dje i yem wori ge, une ye wopake pille awi al ge ye i yem wori. <sup>6</sup> Nono Krai boll mormon ge, God Krai i pla wori mal embe une nono para i pla kupill al worika, Krai po sia king al ami dji al ge nono une boll aike po ami dje mopin. <sup>7</sup> God embe yei ge me embe mal paro. Ipon ne, are kona pa punda ge una kanne, une nono wandill golo Krai Jisas dje wori woi ge une nono wopake kaima pille plato awi. <sup>8</sup> God ye wopake pille awi pille ye i yem

wori, ye yenekne yene kune nayenda. Ye pille gi dji al ye i yem wori. <sup>9</sup> Ye singare wopake ta yei pille, une ye i yem nawori, man, une ye kiwa i yem wori, una ta na kogo yell al, i yem wori we dje kandjiye amblo pla worda ge kune nayendo. <sup>10</sup> Nono Krai Jisas boll mormon pille God nono i gun wori. Une embe yei al ge, nono singare wopake ye wanmopon kondwe ge yene asamoll amblokun ye keru.

*Krais yeika Juda una ne, epil djell una kumbene taimane yei*

<sup>11</sup> Epil djell una ye mor ge, ye asa molo woi mal pillpol to moye. Juda una ye pille embe djinj, kambono gaklene kelip natonj una mor. No gaklene kelip topin una mormon we djinj. Kandja djinj ge yenekne gaklene pille djinj, nomane pille nadjinj. <sup>12</sup> Asa ye Krai boll aike namoi, ye ellke moi, Israel una moi mal ye embe namoi, na wal ta auno we dje God Israel una moi al embe dji ge, une ye moi al ta dje nawi. Are wal wopake ta wonda dje ye nomane al napai, ye God boll aike namoi, ye tarowamo yemoye. <sup>13</sup> Ba alla ipon, ye Krai Jisas boll mor. Asa ye ellke molo pai ba ipon Krai meyamiye al ge ye er manda woi pora dji. <sup>14</sup> Ye epil djell una ne, Juda una kumbene taimane naye ge, gull ta paika ye kunda yemyem una mal embe moi ba Krai ipon wo iwori, ye kumbene taimane yei mor. Ye kumbene pla woi ge alla kal pi, ye epil taimane mal mor.

<sup>15</sup> Iwa Mosis kandja lo porapora bolo pagi ge ne, kandja dongall bolo wori pai mal ge Krai wo iwori. Ye Krai boll moye ge, epil soka namoye,

ye epil taimanta moye dje yei. Embe yei al ge ye kumbene taimane panda moye. <sup>16</sup> Une iko pera al goi ge ye epil djelldjell moi ge, i taimane wordaka God boll moye dje pille goi. Asa ye djelldjell molo kunda yemoye ge, pora djinda dje pille goi. <sup>17</sup> Ye epil djell una ellke morka Juda una manda morka yenj ge une wo ye moi al embe dji, ye kumbene taimane panda molme dji. <sup>18</sup> Nono kumbene taimane paro me ge embe. Krai wo epil soka i taimane wori al ge, Murble taimane molo kond toi, nono Nane moro al bon kune yenda.

*Nono God numbiye kaima yero mal embe mor-mon*

<sup>19</sup> Ge pille ye epil djell una mor ge, ye una gulke mal alla namor, man. God unakiye ne, God wombaye moi al ye er pakna woi mor. <sup>20</sup> Mor pille ye God numbiye mal embe mor. Aposel kambono ne, propet asa moi ge numb doll mal embe moi, alla Krai Jisas numb tuminj paro mal embe moro. <sup>21</sup> Yene wo numb doll porapora ka amblo gi dje awo, numb take aundaka, numb ge Iwa Kerman numbiye wopake djell ta mal yenda. <sup>22</sup> Alla ye Krai boll aike mor pille, God wo ye una djell boll aike ipo, numb taimane take worda moye, God yene Murble ge wo ye boll moyaka, numb ge al aike moye dje pille une takdo.

### 3

*Una epil djell moi al Pol po kogo yei*

<sup>1</sup> Embe yei pille na kaye paro ge, ye epil djell una Jisas boll pillgi djine dje na kaye paro. <sup>2</sup> God na dje wori na ye epil djell una mor al, God nono

wopake pille awi mal na dje pene woro wando. Ye pille kane yenj dje pro. <sup>3</sup> Kandja ge asa seke pai ba God na ombine dje awi pill. Embe dji pill mal ge, na ipon pepa kembis bolo pagill mal ge ye kere kaninj. <sup>4</sup> Krais kogo yei mal kandja seke pai na pille ill mal ge, ye pepa ge kere pille kane yene. <sup>5</sup> Kamasa kandja seke pai ge God dje pene nawori. Ba alla ipon, une Murble wo ombine dje awika, yene aposelye una ne, propetye una mormon ge, une no ombine dje awi pupin. <sup>6</sup> Kandja seke pai ge me embe pai. Jisas kandjiyebe wopake pai al ge, God wal wopake i auno we dji ge, une no Israel una eske imbon dje nawi, une ye epil djell una para ineke nono gaklene taimane panda mopon dje pille awi.

<sup>7</sup> God yembe dongall pai al ge une na wopake pille awika na yene kogoye una moll. Na embe molo po Jisas kandjiyebe wopake dje una awo wando. <sup>8</sup> God unakiye porapora mor ge kandjine paro ba na kandjina naparo, na menameto moro. Ba God na wopake pille dje worika, na epil djell una moi al po Jisas kandjiyebe wopake uro kaima pai ge dje awo wanill. <sup>9</sup> God wal porapora beki iwa ge, une yeno dje pi ge asa seke pai ba, une dje wori na po una porapora moi al une yenda mal dje awo wanill. <sup>10</sup> God wal yeno dje pi ge embe pi, pillgi pai una djineke, tau agelo kerman kambono ne, murble pla mor ge, ga God nomane kerman paro mal, pille kane yene. <sup>11</sup> Ga embe yene ge, kamasa kaima God nomane embe pai. Ipon nono Iwa Kerman Jisas Krais kogo yei al ge God yei, ga kani pora dji. <sup>12</sup> Krais kogo yei al ge nono God moro

al manda bon kune yendo. Jisas boll pillgi djipin ge Kraiss kond yapro awi, kand nagopon, manda bon kune yendo. <sup>13</sup> Na ye pille imb kake moro ge, ye nomane merke napanda. Na imb kakdo ge ye wopake piye, na ye God yene poll dje au kerman djindo al une boll wopake moye dje yendo.

*Pol Epesus una dongall moye dje kamang yei*

<sup>14</sup> Wal me ge al pille, nono Nane moro al ge na gopna boglo aundo. <sup>15</sup> Yene unakiye kupill al morka makimb al morka yenj ge, ga kandjine paro ge na Nena God ga kandjine ye awi mor. <sup>16</sup> Na ye pille kamang embe yendo. God ni wal merkeke paro ge, ni i pagle, Murblen ge dje worbenka ga nomane pakna yembene dongall panda moye. <sup>17</sup> Ye pillgi pandaka ye kumbene paknato ge Kraiss wo ye boll moya dje na kamang yendo. Iko djimbe dongall paro mal embe ye una boll kanwopake kanne me ge, kerman panda dje na kamang yendo. <sup>18-19</sup> Kraiss ye kanwopake kando me ge kermanke paro, pille imbon naparo. Pa er koi koma po, er kona kwa wondo mal embe ye pillgi pai una porapora, yembene dongall boll pille kane yene dje na kamang yendo. God yene elle tukiye al wal wopake puka tondo mal embe, ye para ellne tukne al puka tonda dje na kamang yendo.

<sup>20</sup> God kandjiye kermanke kaima panda moya. Une yembe kerman nono boll kogo yendo ge, aunda imbon dje pille kamang yepin dal, une plato kaima awo yem worda kune yendo, nono kere kanbon kune nayenda. <sup>21</sup> God unakiye moye al ge une kandjiye plato kaima panda moya, Kraiss



Jisas kogo yei al God kandjiye ege ege plato panda pora nadjinda. Kaima.

## 4

### *Krais gakle al una mor ge taimane moye*

<sup>1</sup> Na Iwa Kerman Jisas kogoye yell ge kaye paro ba God ye pille yau to i mal ge, ye singare embe yene dje pille djindo. <sup>2</sup> Ye pillgi pai una boll kiye dje molo kal woro moye. Ye kumbene pla nawonda, imb aune ge ye ege ege kanwopake kane, kere aune. <sup>3</sup> God Murble ye i taimane wori mor mal ge, ye yembe ye una boll kumbene taimane yendaka arngan yenda moye. <sup>4</sup> God nono yau to i pille nono gaklene taimane paraka, God Murble taimane moraka, nono porapora wal wopake ta aunda imbon dje kui yemormon. <sup>5</sup> Iwa Kerman taimane moraka, pillgi taimane paraka baptais\* taimane paro. <sup>6</sup> God taimane moro, une nono porapora Nane plato moro. Nono porapora mormon ge une nono boll pakna molo kogoye yendo.

<sup>7</sup> Krais wal auno dje pi ge, une nono una taiman-taiman dje wopake pille awi. <sup>8</sup> Une embe yei al Baibel kandja embe bolo wori pai,

Une er pla pi poke ge une er wekle po kundayem una merke to kaye to mogi ge, dje ipo wal wopake i, yene unakiye awi *(Buk Song 68.18)*

---

\* **4:5:** Baptais we djindo ge nono pillgi pai una asa mopin mal kere Jisas taimane we dje pille wanmopon dje pille dji.

<sup>9</sup> Une er pla pi we dji ge me embe mal paro, une asamoll kal makimb al woi. <sup>10</sup> Kal woi une ge alla er pla kupill al po er pla kaima po kupill makimb wulle yemyem yei al molo kune yei.

<sup>11</sup> Una moi ge pende aposel kogo yene dje pille dje wori. Pende propet kogo yene dje pille dje wori. Pende yene kandjiye wopake dje una aune dje pille dje wori. Pende God unakiye kantau yene dje pille dje wori. Pende God unakiye beke aune dje pille dje wori. <sup>12</sup> Une embe yei ge God unakiye kambono po une kogoye yene kune yenda dje yei. Ge Krai unakiye yake pla pine dje yei. God unakiye mormon ge <sup>13</sup> yake pla po pillgi dje God wariye pille kane yembon. Yepin dal, una taimane mopon, djelldjell namopon. Krai dongall moro mal nono iwana dongall mopon. <sup>14</sup> Embe yepin dal, una wo kandja kende beke awo, tagemage yene ba nono womba nomane napanda. Kopo tondaka, solwara po wo yendo mal ge nono nomane embe napanda, man. <sup>15</sup> Nono una kanwopake kane, kandja kaima dje una awo, Krai nono ngambalne mal moyaka nono yake kerman bon. <sup>16</sup> Une nono ngambalne mal embe moyaka nono yene kake agle bulngane mal embe molo kune yembon. Nono pakna mormon al kanwopake kanpin dal, nono yake pla po dongall molo, nono taimantaiman dje mormon ge nonekene kogone paro mal yembon.

### *Krais boll molo singare gun yembon*

<sup>17</sup> Na Iwa Kerman kandjiye al kandja dongall embe mal dje ye aundo. Jisas boll pillgi nadjinj una mor ge nomane wopake naparo. Ga yewaninj

mal ye embe nayene. <sup>18</sup> Ga nomane emill ye paraka, ngambalne ku dal paro, wal kaima napir. God nono i gun wordo mal ge kambono orkoto mor. <sup>19</sup> Ngandjill nagor, iwana djingdjang ke eri ye, wal i nambon dje pille pla kaima yenj.

<sup>20-21</sup> Ba una Kraiss kandjiye dje ye awi pi ge, Jisas boll pillgi nadji una singare ke yenj mal ga ye beke nawi, man. Ga Jisas kandjiye kaima dje ye awi. <sup>22</sup> Asa ye Kraiss boll pillgi nadji, ye wal yembon dje pille pla yei ge, ye ngundjo ipo kondwe ke worno dje yei. Ye wal ge kerne, nayene. <sup>23</sup> Ye nomane gun pandaka <sup>24</sup> God ye kuya moye. God wopake ta mal molo singare du kaima dje yendo mal ye embe yene dje beke awi.

<sup>25</sup> Kraiss gagle al mormon ge, yene kake agle mal embe mormon. Ge pille, ye kandja kende nadjine, agane ambane kambono mor al kandja kaima dje aune. <sup>26</sup> Ye ellne kumbsi dal, ye singare ke nayene (Buk Song 4.4) Ye ellne kumbso pamoyeke olpa er kal napunda, ye ola dje kere aune. <sup>27</sup> Ye Satan dumo naune. <sup>28</sup> Kunumb una moya ge kunumb alla nanonda. Yene agle al kogo yenda. Ye dal, una wal nayenda ge une aunda kune yendo.

<sup>29</sup> Ye kandja keke nadjine. Kandja ge ye djil-lakene al er orko nawonda. Ye una pille aglo gi djine kandja paro ge, dje una aune. <sup>30</sup> God ye top to i yem worda poke ge yene Murble ye boll mak yewori paro. Ge pille, ye God Murble kumbe ye ke nayene. <sup>31</sup> Ye una boll ke pille, kumbene ke ye, ellne kumbso, ye ke ye, kandjine mopne amblo, kunda kake yenj ge kerne. <sup>32</sup> Ye una boll wandill golo awo, wopake kane yene. Kraiss kogo yei al ge

God ye djingne djangne kere awi pille, una ye ye ke ye aune ge ye kere aune.

## 5

### *Nono au djindo al wanmopon*

<sup>1</sup> Ye God wombaye mor, une ye wopake kando. Embe pille une singare yendo mal ye embe yene.

<sup>2</sup> Kraiss nono wopake kane, nono pille, yene gakle opa mirang yendo mal i God awi mal embe, ye una kanwopake kane.

<sup>3</sup> Ye God unakiye mor pille, una iwana djingdjang ke ye, gaklene wulle pille pla ye, wal merke kannambon dje pir ge ye embe nayene. Una wo ye singare embe yenj we dje djine. <sup>4</sup> Ye kandja sewe nadjine, kandja keke nadjine, kandja aulaul nadjine. Kandja embe mal paro ge ye boll n-panda, man, ye wopake we dje God aune. <sup>5</sup> Pir mo? Iwana djingdjang ke yenjka, nomane aulaul paraka, wal merke kannambon dje pille we ye singare embe yenj ge, god kende pille pla yenj, God pille pla nayenj. Ye pille kane yene, una embe yei dal, God ne, Kraiss dumene wopake kantau yenmell al ge kambono kaima er pakna napine.

<sup>6</sup> Man, una singare embe yene ba God natonda we dje una kandja kende embe dji dal, ye napiye. Una singare embe ye kandja napi dal, God elle kumbsdaka kaima tonda. <sup>7</sup> Una embe yene ge ye ga boll nawanne. <sup>8</sup> Asa ye emill boll wani ba alla ipon ye Iwa Kerman boll moi pille, ye au djindo al waninj. Ge pille una au djindo al waninj una mor mal ye embe ye wanmoye. <sup>9</sup> Au djindo al wanne

ge megiye tonda. Ge singare wopake ye, kond du dje wane, kandja kaima dje embe yene.

<sup>10</sup> God singare wopake pro mal ye dulo kanine.

<sup>11</sup> Au djindo al nawaninj una mor ge megiye nantonda. Ye ellke moye, ga yenj mal ye i pene woro man djine. <sup>12</sup> Ge ngandjill paro, ga seke molo singare ke yenj ge, nono nadjimbon. <sup>13</sup> Ba au dji dal, wal ke porapora paro ge er pene wonda. <sup>14</sup> Wal ke porapora er pene wo au djindo al moye. Ge pille kandja embe paro,

Ni ou paren ge una golo par mal ni embe paren. Ni agbenka Krai ni wamo sua gale aunda.

<sup>15</sup> Ge pille ye singare yene ge kankune yemoye. Una nomane kulkul paro mal ge ye embe nantanda, man. Ye nomane wopake panda moye.

<sup>16</sup> Ipon nono ye wanmon ge ege ke yero. Ge pille, ye egene yero ge kiwa po djinda, kondwe wopake ta kane i dal, ye kondwe ge al wanne. <sup>17</sup> Ge pille, ye singare aulaul nayene, ye Iwa Kerman pro mal, pille kane yene. <sup>18</sup> Nu wain no singare keke ye djine. Man, ye djineke God Murble ye boll puka tonda moye. <sup>19</sup> God epilye moye al ge ye gollang buk song yero ge dje awo, lotu gollang dje awo, God Murble gollang paro ge dje awo embe yene. Ye ellne tukne paknato ge gollang dje Iwa Kerman aune. <sup>20</sup> Iwa Kerman Jisas Krai kandjiye al ge, ye ege ege wal porapora pille wopake we dje Nane God aune.

*Woge game ami dje mopell mal*

<sup>21</sup> Ye Krai kandjiye pille pla yemolo, God unakiye mor al ge menameto moye. <sup>22</sup> Ana kambono, ye Iwa Kerman moi al menameto mor mal embe, ye wogane mor al menameto moye. <sup>23</sup> Krai yene unakiye i yem worda, ga yene gakle mal embe mor. Mor ge, Krai ga ngambalne moro mal embe, wogane moye ge, ana ngambalne mor. <sup>24</sup> Krai unakiye menameto mor mal embe ye ana ege ege wogane menameto moye.

<sup>25</sup> Krai yene unakiye wopake kane, wopake moye dje pille, goi mal embe, ye iwa kambono ye gamane kanwopake yene. <sup>26</sup> Krai yene awi ge yene unakiye wopake djell ta mal moye dje awi, yene kandjiyebe wopake paro al ga nu was ye awo, djengimb moi ge iworu awi. <sup>27</sup> Krai yene awi ge yene unakiye une nale al wopake djell ta mal moye, ale napanda, djengimb napanda, wambo napanda kiwa moye dje pille yene awi. <sup>28</sup> Krai embe yei mal, ye iwa mor ge, yenekne gaklene wopake kaninj mal embe ye gamane para wopake kanne. Iwa gamane wopake kani dal, yenekne wopake kaninj. <sup>29</sup> Nono kanmon, una ta yene gakle kanke nakando man, yene kantau wopake ye, kwa gale awo embe yendo. Krai yene unakiye para embe ye aundo. <sup>30</sup> Alla yene kake agle ne, gakle paro ge nono mormon.

<sup>31</sup> Baibel kandja embe bolo wori paro,

Ge pille, iwa ta yene neme kere yene game boll  
 bolo imbellka soka gaklene taimane panda  
 mopell *(Stat 2.24)*

<sup>32</sup> Kandja ge seke paro. Krai yene unakiye boll

moye mal pille na djindo. <sup>33</sup> Ba ye iwa kambono mor ge, ye yenekne kanwopake kaninj mal embe, ye gamane moye al kanwopake yene. Alla ana kambono ye moye ge, ye wogane kambono pille pla ye aune.

## 6

*Womba nanemane boll moye mal Pol kandja dje awi*

<sup>1</sup> Ye womba mor ge, ye Iwa Kerman boll mor pille, ye nanemane kandja djine mal yene. Ge singare kune mal paro. <sup>2-3</sup> God kandjiye bolo wori paro ge embe djindo,

Ye womba mor ge, ye nanemane wopake ye awo, molo kal woro moye we dje Mosis embe dji  
*(Kisim Bek 20.12)*

Lo yero ge kandja wopake ta boll aike paro. Kandja wopake paro ge embe mal paro,

Nane mane kandja djineke ye pille i dal, ye makimb al moye ge, ye wopake molo kanan moye we dji  
*(Lo 5.16)*

Lo pende kandja wopake boll aike wonj ba are wonj. Lo yero ge kandja wopake boll aike wor wekle wondo.

<sup>4</sup> Ye nane kambono mor ge, wal ta yeneke ye wombane kumbene ke ye djinda, ye kantau wopake ye, Iwa Kerman kandjiye al kandja beke awo, amblo du dje awo embe yene.

*Boi una ne, kantau yenj una pille, Pol kandja dji*

<sup>5</sup> Ye boi una mor ge, ye kantau yenj una djine mal embe yene. Ye kand golo, pille pla ye awo, singare kende nayene. Ye Krai kandjiye al pille yenj mal embe, ye kantau yenj una kandja djine mal embe yene. <sup>6</sup> Ye ga wopake kanne dje ye kogone yene ba alla ga namoi dal, yene kogo dji mal ye kune yene. God kandja djinda mal, ye Krai boiye una molo nomane wopake boll yene. <sup>7</sup> Ga kogone paro ge ye wopake pille yene. Na kogo embe yendo ge na una pille ye naundo, na Iwa Kerman pille ye aundo we dje pupen. <sup>8</sup> Ye pillme! Ye boi una moye mo ye boi una namoye, God ge napiya. Una singare wopake yene mal God wopake ye awo yem woro aunda. <sup>9</sup> Ye kantau yenj una, ye boi una ye moye al singare wopake yenj mal, ye para ga moye al singare embe yene. Ga kand goye dje kandja dongall dje naune. Ye kaninj, ga kantau yendo iwa moro ge kupill al moro, nono porapora awo i kune yendo. Alla une ye para kantau yendo.

### *Kunda konkunom worbon mal*

<sup>10</sup> Na kandja ba dje pora djindo. Ye ege ege djineke Iwa Kerman yembe dongall i aundaka ye boll dongall pandaka wanmoye. <sup>11</sup> God kunda konkunom porapora yero ge yeworo wanne. Ye embe yei dal, Satan tagemage yenda ba ye aglo gi dje moye, nayagne. <sup>12</sup> Nono kunda yenmon ge makimb una boll kunda nayenmon man, una kerman yembene pai una emill yei al mor ge boll kunda yenmon. Iwa kerman kambono, ngambalne pai una, yembene paraka singare kerawa ye, kona pla waninj ge nono kambono boll kunda



yenmon. <sup>13</sup> Embe pille, God kunda konkunom porapora nono aundo ge yeworo wanne. Ye embe wori dal, ege ke wonda poke ye aglo gi dje molo, kunda pora dji dal, ye para aglo gi dje moye.

<sup>14</sup> Ye aglo gi djine panda, ye ka purba i kumbene al tur mal embe, ye kandja kaima i nomane al worne panda. Krai singare wopake paro ge ye i kunda konpakna gonne al worinj mal embe worne. <sup>15</sup> Jisas kandjiyebe wopake pai al ge una kumbene arngan yenda moye. Moye mal ge ye i kakene su dal woro kandja ge ye una boll dje aumbon dje yene.

<sup>16</sup> Konkunom ta worne ge embe. Satan ei wamo boll tonda ye naboye, ye pillgi paro ge kumba dal embe pandaka ei tonda ge gomda. <sup>17</sup> God ye i yem wori, ye wamo al napine ge ye pille moyeke, ye nomane ge kunda kon pula mal embe panda. Ye God Murble djebainat dal amblo gi dje moye, ge God kandjiye paro. <sup>18</sup> Ye ege ege God Murble boll kamang kayekaye yene. Ye kane kune yemolo ege ege God unakiye pille kamang ye aune.

<sup>19</sup> Kamang yene al ge ye na para kamang ye aune. Jisas kandjiyebe wopake seke paro ge na kand nagolo dje pene worna una piye dje ye kamang yene. <sup>20</sup> God na dje wori na Jisas kandjiyebe wopake dje wanill pille, una na to kaye wori moro. Ye na kamang ye auneke na kand nagoyo, kandja ge dje pene worno mal paro.

*Pol dumo Epesus una dje wopake ye awi*

<sup>21</sup> Na moro mal ne, na kogo porapora yendo mal ge, iwa Tikikus wo ye dje aunda piye. Une ge nono agane wopake moro. Iwa Kerman kogoye yendo

ge, une pai mal yendo. <sup>22</sup> Na une dje wornaka ye mor al wo dje aundaka no mormon mal ge, ye pille kane ye aglo gi dje moye. <sup>23</sup> Agana ambana kambono, nono Nane God ne, Iwa Kerman Jisas Krai soka ellne tukne arngan ye aumbellka, ye una wopake kane, pillgi panda moye. <sup>24</sup> Nono Iwa Kerman Jisas Krai wopake kanmolo pinj una ye mor ge, God ye wopake pille aunda moye.

**Jisas Kandjiyebe Wopake**  
**New Testament in the Kandawo language of Papua**  
**New Guinea**  
**Nupela Testamen long tokples Kandawo long Nuigini**  
copyright © 2012-2014 Wycliffe Bible Translators, Inc.

© 2012-2014 Wycliffe Bible Translators, Inc.

Language: Kandawo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

---

PDF generated using Haiola and XeLaTeX on 21 Feb 2024 from source files dated 31 Aug 2023

80f977cd-3a08-50fd-b6ee-9b3597c767cd